





IN FUNERE
FRANCISCI I.

ROMANORUM IMPERATORIS ELECTI

ORATIO

HABITA IN SACELLO QUIRINALI

CORAM

CLEMENTE XIII.

PONT. OPT. MAX.

A

CAROLO MATTHIA

S. R. I. COMITE A STRASOLDO.



ROMÆ, MDCCLXV.


APUD FRANCISCUM BIZZARRINI KOMAREK,

PROVISORIS LIBRORUM BIBLIOTHECÆ VATICANÆ.



SUPERIORUM FACULTATE.

Digitized by the Internet Archive
in 2015



ORATIO.



TINAM ea esset hominibus
nascendi conditio , ut
quantum virtute cæteris præstant , tantum
vitæ diuturnitate reliquis anteirent ! FRAN-
CISCI ROMANORUM IMPERATORIS Electi conspe-
ctu frueremur potius , quam acerbissimum ex
B repen-

repentino illius interitu susceptum moerorem laudum suarum recordatione solaremur. Verum etsi ad sensus nostri jucunditatem optanda maximè integerrimo Principi immortalitas erat; tamen, quandoquidem pro conditione naturæ hic quoque ultimus vitæ actus FRANCISCO agendus fuit, eundem hujusmodi obitu rectè factorum suorum præmium amplissimum fuisse adeptum nemo inficiabitur. Etenim, cum tristissimum nuncium aut nostras, aut aliarum gentium aures perculisset, quæ subita animorum perturbatio, qui luctus, qui moeror non sunt consecuti? Doloris acerbitate prostratam Augustam Conjugem, lacrymis perfusos præstantissimos Filios, Fratrem, Sororem nobilissimos Principes squallore confectos: Aulam, Oenipontum, Regna, Provincias luctus gravitate insumma esse moestitia aut sanguinis conjunctioni, aut acceptis beneficiis referri potest. Quod autem demortui Cæsaris casum tanta moeroris significatione Europa universa sit prosecuta, id totum singulari illius virtuti unicètribuendum esse confirmo. Quare, cum in hoc Sanctissimo, Gravissimoque Orbis Terrarum Confessu funebris FRANCISCI I. laudatio habenda sit, patere,

CLE-

CLEMENS Beatissime , me de rebus ab illo præclarè gestis breviter differentem id unum contendere; Nihil scilicet defuisse FRANCISCO , quin Imperator Optimus habeatur . Quod si Tibi acerrimo virtutum æstimatori genus hoc laudationis probatum esse intelligam , immortalis extincti Cæsaris gloriæ , ac merito singulari maximum supremis hisce Pontificiis honoribus cumulum accessisse , nemo erit , qui non libentissimè fateatur .

Atque ut jam inde a principio intelligere quisque possit , quid mecum ipse cogitans sentiam , cum Optimum Imperatorem dico , facite , illud vobis in mentem veniat , non quæ privatum hominem aut exornent , aut deceant hic a me percenseri , sed quæ publicum bonum spectant , & in quibus Gentium , ac Populorum aut salus , aut felicitas continetur , atque adeò , quæ verè Imperatoriæ virtutes sunt , eas ad immortalem FRANCISCI gloriam me oratione complecti . Quare aliis ornatissimo dicendi genere commemoranda libenter relinquo , quæ vel in opulentissima rei familiaris administratione sapienter providit FRANCISCUS ; vel in præclarè ad gloriam , & amplitudinem , & ad

❧(VI)❧

res magnas bene gerendas præstantissimis Filiis instituendis Pater amantissimus contulit; vel in domestica rerum cæterarum procuratione Princeps integerrimus diligentissimè posuit. Dicent ii humanissimam comitatem in suos, quibuscùm familiarissimè ageret; Dicent singularem animi mansuetudinem, quæ mitissimo responderet ingenio; Dicent tantam in summa rerum fortuna Maximi Principis moderationem, quantam vel in infimo quoque homine miraremur. Itaque, FRANCISCE IMPERATOR, domesticæ hæ tuæ laudes celebrabuntur illæ quidem non solum à tuis, quibus quanta esses vitæ innocentia, quanta morum suavitate, quanta in rebus omnibus continentia licuit propius inspicere; sed & propagatam in Filiis Paternæ virtutis speciem, & ornamenta nulla unquam vel remotissima ætas non intuebitur, nullumque tam iniquum rerum æstimatorem futurum scio, qui te optimi Patris familias partes omnes planè implevisse non videat.

Verùm ejusmodi res licet præclaræ sint, & in Christiano Principe maximè commendabiles, eæ tamen non sunt, quibus Cæsarem inservire oportet, & ostentare se, ut, postquam

quam privatae laudis gloriam adeptus est, habeat Posteritas, quod celebrando commemoraret, quodque saeculorum omnium memoria vigeat sempiterna. Quare ea multa tam varia, tam dissimilia, atque impedita, quae, ut in officio Populi contineantur, civilis disciplinae sunt propria; quae vel in praecavendis hostium conatibus, vel in fovenda Amicorum gratia Regnorum securitatem spectant; quae in bonarum artium studiis requiruntur, ut optima quaque disciplina juvenus liberalissime erudiatur; quae denique sive ad otii stabilitatem, sive ad pietatis cultum & integerrimam Religionem referuntur, sapienter disponere; quae publicae commoditati profint, ea promovere, quae noceant longissime avertere; pacis ornamenta conservare, litterarum subsidia conquerere, cuncta demum opportunis functionibus constituere, aut facile expedire, ita ad boni Principis rationem pertinere intelligitis, ut qui ea omnia, quemadmodum FRANCISCO I. feliciter contigit, toto vitae suae cursu sit persecutus, idem vobis verè Imperator fuisse Optimus videatur.

Et sanè, quid aut Christiani Principis me-
D moriae

moriæ gloriosum magis, aut Germaniæ Popu-
 lis, qui felici illius Imperio paruerunt, com-
 modius unquam potuit accidere, quàm ut
 FRANCISCI I. in Deum Religio, & morum san-
 ctitas, eæ quidem non adumbratis, atque adeò
 incertis signis expressæ, sed manifestis, iisque
 diuturnis significationibus indicatæ in omnium
 oculos essent? Testem appello magnificentissi-
 mum Sacellum illud, quod ad Posterorum me-
 moriam dedicatum, ac positum esse voluit
 FRANCISCUS eodem ipso in loco, quo illi se Im-
 peratorem fuisse electum primò nunciatum est:
 qua una re Principem religiosissimum satis osten-
 disse confirmo, se Imperatoriam, quam obti-
 nuerat dignitatem, a DEO O.M.,cujus nutu hu-
 manæ sortes vertuntur, unicè sibi collatam in-
 tellexisse. Mirari itaque desinant, qui publica
 Tempia adeuntem FRANCISCUM, ibique non de
 genu tantum, sed inclinato corpore, proje-
 ctoque in terram vultu diutissimè commoran-
 tem, præsertim cum statutis per annum die-
 bus frequentissimo inspectante populo ad Eu-
 charisticam mensam sæpius accederet, intimo
 quodam, & suavissimo pietatis, ac religionis
 sensu commotum Principis animum obstupesce-
 bant.

bant. Qui enim non Lotharingiæ Familiæ splendori, non Regum, ac Principum consanguinitatibus, & amicitiae, non Suffragatorum consensu, & gratiæ, non demum virtuti, & merito ipsi suo, quod renunciatus fuisset Imperator, referret acceptum, is non domestico tantum, & intra Aulæ suæ parietes concluso pietatis studio, verum publico etiam, eoque singulari veræ, germanæque Christianæ Fidei testimonio certissimum animi, mentisque suæ indicium non poterat Princeps Optimus non ostendere.

Habent, ut planè intelligitis AA., habent in FRANCISCI pietate, quod laudent Populi: habet quod imitetur Posteritas: habemus, quod in religiosissimi Principis repentino interitu & nos graviter doleamus, cum tanta Optimi Imperatoris virtus morte extincta subita sit. Neque enim tantum sanctissima ejusmodi, quæ ad mores, vitamque piè, rectèque informandam pertinerent exempla; verum illa quoque in supplicum precibus excipiendis singularis humanitas, ii ad Principem faciles aditus, illa vel in rebus secundis, vel in adversis imperturbata animi moderatio, illud publicæ tranquill-

quillitatis studium , ille bonarum artium , ac doctrinarum amor , & cura , illud immortalitate dignum ingenium & suis , & nobis FRANCISCI I. acerbissimo obitu erepta sunt.

Cum repente soluto gelu miserum in modum Danubius exundasset , horret animus commemorare tristissimæ illius calamitatis acerbitatem , & luctum . Viennæ in Leopoldi suburbio ad prima ædificiorum usque tabulata undæ pervenerant , quin afflictis Civibus aut alluvionem prænoscere , aut periculum fugere licuisset . E superioribus domorum pontibus clamabant miseri ; vicinæ Urbis implorabant auxilium ; terrore , angustia , fame conficiebantur ; nullus tamen in eo rerum articulo aut tam misericors , aut tam audax fuit , qui in præsentī vitæ discrimine aut amicis , aut cognatis , civibus certe suis , opitulari non recusaret . Unus inventus FRANCISCUS est , qui , non dicam Imperatoris dignitate , sed vita ipsa posthabita , Patriæ Charitatis in subditos memor naviculam conscendens æstuosa vada trajiceret , afflictos consolaretur , escas manu ipse sua suppeditaret , filios veluti sibi carissimos complecteretur . Utinam temporis mihi

ad

ad dicendum dati diligenter habenda ratio non esset ; quæ hoc loco Tibi proponerem considerata , CLEMENS Beatissime , qui liberalitate in pauperes , amore in afflictos , pietate in omnes intelligis , quam dulce amantissimo Parenti sit filiorum aut egestatem , aut dolorem , aut solitudinem sublevare ! Verùm de OPTIMI IMPERATORIS laudibus dicendum est .

Itaque habent Viennenses magnifico , verèque regali sumptu constituta ædificia , in quibus , quæ ad plantarum , stirpium , lapidum , metallorum , cæterarumque naturalis historiæ partium cognitionem spectant , ad publicam Studioforum utilitatem multis impensis , diuturnoque labore è remotissimis quibusque regionibus conquisita , & collecta asservantur : Habent Florentini Medicei illius Musei gemmarum , & antiquorum numismatum singulari copia amplificata , & aucta cymelia ; Habent Pisani artium omnium optimarum , & sapientiæ veluti domicilium Lyceum suum ad juvenum institutionem præclaris doctoribus instauratum ; Vigent promotæ artes , dilatatum commercium , tranquillitas Populis restituta :

narrant non pauci, qui cùm Viennam adirent, ibique Clementia Principis humanissimè fuissent accepti, de antiquitate, de artibus, de commercio, de naturæ historia, de rebus physicis ita se differentem FRANCISCUM audivisse, ut sibi non jam Imperatorem, verùm Doctorem aliquem, illumque scientissimum allocuti esse viderentur. Quæ omnia, quàm acerbus Etruriæ dolor, quàm gravis Germaniæ luctus, quàm debita universorum solitudo, & moestitia sit, quin pluribus verbis utar, fatis per sese declarant.

Quo in loco ad immortalem, illamque maximam extincti Principis gloriam illud præterire non possum; hæc tanta bona, tam multa, & tam varia, quæ subjectis sibi gentibus procuravit FRANCISCUS, hæc eadem diuturno cum otio, & non interrupta tranquillitate semper fuisse conjuncta. Recalent adhuc humano sanguine, quæ in Mare Germanicum sese evolvunt flumina, & desolati Provinciarum agri nudis ossibus albescentes fatis docent, quemadmodum ipsis quoque victoribus interdum acerba victoria sit. Finitimarum, Provinciarum incendia, cladium miserrimarum


rum lamentationes , militum , & armorum strepitus exterritæ acceperunt IMPERATORI OPTIMO subjectæ Urbes , cum illæ interea Principis amantissimi cura , veluti in ipso tranquillitatis sinu placidè conquiescerent ; itaut , quo tempore illis tam magno bono frui datum est , atque concessum , nemo esse potuerit , qui easdem fortunatissimas non judicaret .

Quid ? Si felicissimum hoc otii genus , ut suum quoque post obitum Populis diuturnum esset , atque perpetuum , FRANCISCUS studuisset ? Plurimis , iisque valdè singularibus beneficiis , quæ in suos contulit , immensa quædam , & nova Patriæ Charitatis facta esset accessio , de qua nulla unquam tam barbara , nulla tam fera posteritas conticescet . Facilè , ut puto , videtis A A. , me de auspiciatissima illa ROMANORUM REGIS electione , qua JOSEPHUS II. futurus CÆSAR est renunciatus , intellexisse . Etsi enim eo consilio patriæ in spectatissimum FILIUM charitati obsecundavit FRANCISCUS , simul tamen naturæ communis fragilitatem , & incertos valetudinis eventus cogitans Germaniæ universæ felicitati ille prospexit ; cui si minus providè consultum foret , quibus for-
talse

taſſe graviſſimæ tempeſtatis incertis fluctibus nunc agitata perturbaretur?

Quare communem inter Ordinum omnium ſquallorem , atque moeſtitiam illud unum conſolationis genus reſtare dixerim , quod FRANCISCI cura JOSEPH II. ROMANORUM REX ſit renunciatus. Etenim cum is patriæ & dignitatis, & virtutis ſit hæres, quæ in Auguſti Parentis vita ad publicam utilitatem ab OPTIMO IMPERATORE commoda profluxerunt, quod Religionis ſtudium, qui liberalium diſciplinarum amor, quæ diuturna tranquillitas FRANCISCI Imperium illuſtrarunt, eadem in Cæſarem Filium translata Imperii, Germaniæ, atque adeo Europæ univerſæ felicitatem conſtituent. Diu itaque & populorum omnium bono, & virtuti, atque gloriæ ipſe ſuæ, & FRANCISCI I. divinis laudibus JOSEPH II. ut vivat, optandum nobis eſt: quoties enim extincti Principis Imaginem in Auguſto Filio ſuperſtitem intuebimur, toties FRANCISCUM neque morte tam ſubita nobis ereptum, neque omninò interiſſe putabimus; quin præclara illius facta novi Cæſaris largitate, & beneficentia, tranquillitatis ſervandæ

vandæ studio, & cura, pietate in Deum, ac Religione, ad Catholicæ Ecclesiæ præsidium, atque tutelam, ad gentium, & provinciarum felicitatem, & pacem, ad Europæ universæ tranquillitatem, & otium, aut conservata fuisse nobis, aut restituta, & TU qui Christiani Orbis bono Petri Cathedram occupas planè senties Pontifex O. M., & simul tecum nos omnes facilè intelligemus.



IMPRIMATUR,

Si videbitur Reverendis. Patri Magistro Sacri Palatii
Apostolici.

Dominicus Jordani Archiep. Nicomediae Vicesg.



IMPRIMATUR.

Fr. Thomas Augustinus Ricchinius Sacri Palatii Apost. Magister.

SPECIAL
74-B17007

XXX

THE GETTY CENTER
LIBRARY

